



Inatsisartunut ilaasortaq
Asii Chemnitz Narup, Inuit Ataqtigiinni ilaasortaq
/Maani

06-10-2022
Suliap nr. 2022 - 19592
Akt. id. 21346104

Postboks 970
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

Aaqqissuusnaanermut iluarsaaqqinnissaq pillugu § 37 naapertorlugu apeqquteqaammut 180_2022-mut akissut.

Asasara Asii Chemnitz Narup,

Apeqqutitut saqqummiunneqartunut qujanaq. Apeqqutit matuma kinguliani ataasiakkaarlugit issuarneqarput, akissuteqaat kingornaniilluni.

1. Kommunit aaqqissuuteqqinneqarnerannut ataatsimiititaliap qitiusumnik allaffeqarfissuarmit (namminersorlutik oqartussat) kommuninut suliassanik nuussinissat pillugit kaammattuutaasa piviusunngortinneqarnerannut killiffik ullumikkut qanoq ippa:

a) Kaammattuutit suut atulersinneqareerpat – suullu suli atulersinneqanngillat?

Akissut. Kommunit aaqqissuuteqqinneqarnerannut ataatsimiititaliap isumaliutissiissutaa – Pisortat suliassaqrifiisa aaqqissugaanerannik iluarsaaqqinnissaq pillugu isumaliutissiissut 2005-imi saqqummiunneqarpoq. Tamatuma pereerneraniilli pisorpassuaqarpoq. Tamatuma kingorna isumaliutissiissut ataatsimiititaliap inassuteqaatai ilanngullugit Inatsisartunit, aammalu borgmesterit Naalakkersuisunullu ilaasortat taarseraallutik, Naalakkersuinikkut ataqtigiissaarisooqtigiinnit suliarineqarpoq. Naalakkersuisut kommunillu missingersuutitut suleqatigiinnissamullu isumaqtigiissummik taagorneqartumi pisortani suleqatigiinneq pisortatigoortunngortippaat, tassani tunngaviusut atuutsinneqalerlutik aammalu suliassat nammagassallu agguarneqarnerat aamma ilaatinneqarluni.

Kommunit aaqqissuuteqqinneqarnerannut ataatsimiititaliap isumaliutissiissutaani 64-inik inassuteqaateqarfiusumi inassuteqaatit annertunersaat piviusunngortinneqareerpoq. Tassalu kommunit aaqqissugaaneranni kommunit 18-iusut sisamaannanngortinneqarlutik allannngortinneqarmat, tamatumalu kingorna kommunit tallimannngortinneqarlutik. Inassuteqaatit sinneri kommuninut suliassanik nuussinissaq pingaarnerulluni, Naalakkersuinikkut Ataqtigiissaarisooqtigiinni, borgmesterinit tamaginnit Naalakkersuisunillu aallartitaqarfiusumi ingerlaavartumik nalilersorneqartarput politikikkullu suliarineqarlutik.



Suliassaqarfiit makkua kommuninut nuutinneqarput.

- Innarluutilinnut suliassaqarfik
- Meeqqat atuariinut atualertusanullu suliassaqarfimmi sanaartugassat
- Annertusisamik immikkut atuartsineq, ilanngullugu PPR.
- Savaateqarfinni sanaartorneq aqqusinernillu aserfallatsaaliuineq
- Meeqqanut akilersuutit
- Meeqqanut tapiissutit
- Pisinnaatitsissutinik tunniussisarneq aamma aallaaniarnermut allagartanik tunniussisarneq
- Najukkani/kommunini ajornartoornernik aqutsinermut upalungaarsimanermullu pilersaarusiornermut piginnaatitaaneq akisussaaffillu
- Ajornartoornerni, ajutoornerni imaluunniit ajunaarnersuaqarnerani suliniuteqarnissaq
- Nunaannarmi assartuutit motorillit
- RAMSAR-eqarfinni nakkutilliineq
- Sumiiffinnik eqqissisimatitanik nakkutilliineq

Ineqarnermut suliassaqarfiup tunniunneqarnissaanut aningaasalersorneqarnissaanullu aaqqiissutissanut ilusiliat assigiinngitsut suliarineqarput

b) Kaammattuutit suli atuutilersinneqanngitsut atulersinneqarnissaanut piffissamik pilersaarut qanoq ittoq naatsorsuutigineqarpa?

Akissut. Apeqqummut 1.a-mut akissut innersuussutigineqarpoq.

c) Kaammattuutit ilaat Naalakkersuisut allanit pingaernerutippaat? Naalakkersuisullu kaammattuutinut ataasiakkaanut pingaarnersiunerat qanoq isikkoqarpa?

Akissut. Apeqqutinut 1.a-mut, 2.a-mut aamma 2.b-imut akissutit innersuussutigineqarput.

d) Kaammattuutit suut Naalakkersuisut atuutilersinneqarnissaat kissaatiginngilaat?

Akissut. Apeqqutinut 1.a-mut, 2.a-mut aamma 2.b-imut akissutit innersuussutigineqarput.

2. § 37 apeqqut nr. 147/2022-mi ilaatigut (apeqqut 3-mi) Naalakkersuisut pisortat ingerlatsiviini aaqqissuusseqqinnermi suut anguniagaralugillu pileraarutigineqaraat apeqqutigaara, tassani siunissami kommunit Namminersorlutillu Oqartussat akornanni suliassanik agguaassinissamut ilaatigut tunngatillugu. Naalakkersuisut akissuteqarnerminni "Naalakkersuisut suliffeqarnermut periusissiaat 2022-2024" innersuussutigaat, tassanilu suliffeqarnermut immikkoortuni kommunit Namminersorlutillu Oqartussat akornanni suliassanik agguataarinninnermik aaqqissuusseqqinneq kalluarneqarpoq.

a) Suliffeqarnermut immikkoortoq pisortat ingerlatsiviini aaqqissuusseqqinnerup nangingeqarneranut taamaallaat Naalakkersuisunit anguniagaqarfigineqarlunilu pilersaaruteqarfigineqartutut akissut paasineqassava, tassani siunissami kommunit Namminersorlutillu Oqartussat akornanni suliassanik agguataarinninnermut tunngatillugu?



b) Taamaattoqangippat: Pisortat ingerlatsineranni immikkoortut allat suut aaqqissuuteqqinneqarnissaannik Naalakkersuisut anguniagaqarlutillu pilersaaruteqarpat, tassani siunissami kommunit Namminersorlutillu Oqartussat akornanni suliassanik agguataarinninnermut tunngatillugu?

Apeqqutit 2.a. aamma 2. b. ataatsimoortillugit akissuteqarfigineqarput.

Naalakkersuisut maannakkorpiaq Attassinissamut Siuariatornermullu pilersaarut 2 nutaaq, 2023-mut Aningaasaqarnikkut ingerlatsineq pillugu Nalunaarusiami eqqartoqqissaarneqartoq, taamatullu 2023-mut aningaasanut inatsisissamut siunnersuummut nassuiaatini nalinginnaasuni nalunaarutigineqartoq, piareersaleruttorpaat. Attassinissamut Siuariatornermullu pilersaarut 2 maannakkorpiaq 2023-mi ukiup affaani siullermi tamanut saqqummiunneqassasoq naatsorsuutigineqarpoq aammalu ilaatigut pisortat suliassaqarfiinik nutarterinissaq pillugu immikkut iluarsaaqqinnermi aqutissamik imaqassaaq. Taanna kiisalu pisortat suliassaqarfiini suliassanik isumaginninnermut tunngaviusut kommunit aamma Namminersorlutik Oqartussat akornanni isumaqatigiissutigineqartut, 2020-miit missingersuutinut suleqatigiinnissamut isumaqatigiissummi nutaanerpaami ilaatinneqartut, innersuussutigineqarput. Tassani ilaatigut allassimavoq:

"Pisortat suliassaasa agguataarsimanerannik isumagineqarnerannillu naliliisarneq ingerlaavartumik pissaq."

"Suliassanik isumaginninnermut aallaaviuvoq, suliassat oqartussami suliassamik sularinnilluarsinnaanerusumi inissinneqartassasut. Tassunga atatillugu aamma illuatungeriit tamanna naapertuuttut nalilerpassuk, pisortat ataatsimoortumik isumaginninnissaannut periarfissaq ilaatinneqarsinnaavoq, ilanngullugu pingaartumik pisortat suliassaqarfiinik digitalinngorsaanermut tunngatillugu."

Inussiarnersumik inuulluaqqusillunga

Jess Svane